



Te provincie di Udin al prin
dì, di Zenâr dal doimil e trente si contavin 135 paîs. Un plui biel di chel
altri. Mortean cul so cjampanili, Palme a forme di stee, Acuilee capitâl dal patriarcjât,
Cividât cul so pint dal Diaul, Vençon cu li sôs Mumiis, Glemone cul so
Cjampon. Lassìn sta ducj chei altris che de Cjargne fin al mâr a fasin di
cheste provincie une maravee, se no, no la si finìs plui.

Ma tornin ae provincie di

Udin, che a tacâ dal prin di Zenâr dal 2031 no veve plui ducj i Comuns che a
contave l'an prime. 'nt veve trê di mancul.

Ce jerial sucedût? Jerino stâts sdrumâts di cualchi taramot,
jerie rivade cualchi epidemie di vè copade dute la lôr int?

Nissune di chestis

disgraciis. Pe precision si tratave di Basilian, che dal mê di Novembar simpri
dal 2030, al jere diventât, par vie de sô squadre di Balon, teritori dai
Emirâts Arabos; Pagnà, che simpri tal stes an, dopo Palermo al jere diventât il
53° Stât Merecan. Infin Feagne, che cun cheste conte us contarìn la sô storie, cul
so formadi, i siei mus e cu lis sôs cicognis, in chei agns, e jere diventâde un
dai Comuns plui siôrs de provincie di Udin e, e forsit par chest tal 2030 e
jere finide sot des mans dai cinês.

Tant Siore che la vevin

stimade inte borse di Milan. Adiriture par tant che e jere insiorade, tal paîs
a vevin cjatât ancje i bêçs par tornâ a fâ sù il so cjistiel, tal e cuâl di

chel che a vevin tirât sù mil agns indaûr. Cun di plui, no si sa cun cetancj assensôrs, scjalis mobilis e no stin a fevelâ da bande largje e dal sistemi Wi-Fi che al cuvierzeve ogni tor dal cjistiel.

Insome Feagne e jere

deventade un patrimoni, tante gracie, al diseve plui di cualchidun. Pecjât che tante bondance cul passâ dal timp e je deventade une vere disgracie. E dut par colpe di chei tancj feagnots, che come che o contavi parsore e àn fat stimâ in borse dut il paîs.

Par fâle curte, se un

cristian al veve une cjase che e valeve 500,000

euros, fasintle stimâ inte borse di Milan, invezit di 500,000 al jere sigûr che je varessin stimade

trê voltis di plui.

Cussì in chel paîs, lassant

sta cualchi sotan, puaret, nassût par e che cussì al veve di murî, ducj a jerin deventâts siôrs tant che i seics dal petroli. Parfin il Comun fasint valutâ in borse il cjistiel e ducj i palaçs sot dal so mandament, al jere deventât cussì siôr che al varès podût comprâ Gurize, Pordenon, Udin e Triest ducj insieme.

Biâts, ni tal Comun e tant

mancul jenfri la int a savevin che dutis chês bondancis che a vevin invistît inte borse a jerin deventadis azions che cualchidun, magari plui siôr, cuistantlis, al varès podût cussì deventâ paron di dute chê robe.

E cussì a son ladis lis

robis. Feagne di une dì a chê altre le àn comprade i cinês. Ce disgracie!

Fossie finide dome cussì. I cinês a pene comprade, le àn fate deventâ, cun dutis lis sôs bielecis, une piçule citât Stât, cul cjistiel che al jere deventât il palaç dai gnûfs parons. Tant al è vêr che dute la int nassude jenfri i siei mûrs e jere deventade foreste a cjase sô.

Lis robis, par sô fortune si

son comedadis graciis ae lenghe che a fevelavi in chê citadine: il furlan. La stesse che si fevelave e che si fevele ancjemò, e che par fortune, almancul chê, non vevin podût invistâ inte borse di Milan.

Ma ce jerial sucedût? Ven a stâi che dutis chês bondancis che une volte a rindevin une fortune, cui cines, che une volte diventâts parons les lavoravin e comerciavin tal lôr lengaç no frutavin plui un centesim. Al è stât cussì che dopo vincj agns di ocupazion a àn rivendût par un blanc e par un neri dutis chês sostanziis a chei feagnots che cun tante umiliaziions, par tancj agns, si sintivin emigrants a cjase lôr.

di Nello Malisano